

1 YOWAN

Rau Yo Yowan Iwode I, In Atu Ki

Betanga Ke Yepongo Dook Mata

1 ¹Au i awodo rau i pang ye Betanga tani yo ke yepongo dook mata i. Ya in iyepe mukot ye kene yo so tina nga le imot pombe tiaŋ nga. Ngan au i aye di aposol kapala amlonga, inbe amkamata. Le moolmool, amkamata ye matamam inbe amtoka ye baemam. ²Ngan Betanga tani yo pombe mallangana le amkamata in la amwetewete ye i, inbe amwete pobe pang ye yepongo dook mata yo taukan motingi i. Muku ngan iye Tamada tiyepe, motong la pombe mallangana pang yidi nga. ³Nen le am nga amye Tamada inbe Natunu Yesu Kirisi ngan amgaua lomam le atu. Le amwete moolmool pang ye Tool tani yo amkamata inbe amlonga i, a be nen ngan kagaua lomim le atu ila yam aposol. ⁴Ngan la amwodo rau i pang be ilonang a be nen ngan idi le imot lod ponana.

Maro In Sul Loloana Kiidi

⁵Le betanga tani yo amlonga ye Yesu Kirisi a be amweta pang in nen: Maro in dawa ben sul loloana, le mala be todo kasin pa iken ye, ngan tiap. ⁶Le kumata tawete be idi nga tagaua lodo le atu ye Maro, bong taye i tootoo dada dook tiap yo ke noonoo nga, ngan idi nga tooltool ke kaplungunu, inbe tatoo betanga moolmool yo ke Maro, ngan tiap. ⁷Bong kumata be idi nga tapa ye sul loloana dawa ben ya in iyepe ye sul loloana nga, ngan ole taye di tooltool kapala ke Maro tagaua lodo le atu, inbe ole rara ke Natunu Yesu in igiri noonoo yo kiidi nga le imot.

⁸Nen le kumata tawete be idi nga taukada noonoo nga, ngan idi taudu nga tallungidi, inbe betanga moolmool ke Maro sa iken lodo tiap. ⁹Bong kumata be tatulu lodo pang Maro nga, ngan ole igiri noonoo kiidi, inbe iyei idi le taye i tooltool noonoonoo ye matana. Ngan ole iyei nen, yesoo kanakana ngan itoo betanga ki yo ipamede i, inbe itoo dada yo dook mata ngan leu. ¹⁰Nen le kumata tawete be idi nga taye i noonoo tiap nga,

ngan ye betanga kiidi tani in ben tawete Maro in tool ke kaplungunu, inbe betanga ki iken lodo tiap.

Kirisi In Loningi Kiidi

2 ¹Ang di natuk yo lok pang mai san nga, awodo betanga i pang, a be nen ngan kayei noonoo be. Bong kumata tool sa be iyei noonoo nga, ngan idi nga tool kiidi atu ke be iwetewete pang Tamada a ilonidi ye betebetanga kiidi. Ngan ya la Yesu Kirisi i, inbe ya taleu in la Tool Noonoonoo ke Maro i. ²Inbe ya in iraiia tinini le imot inbe tiraumate a be nen ngan Maro iyemenai idi ye noonoo yo kiidi, ngan be. Ngan ye yo iyei nen nga, ngan be nen a Maro igiri noonoo kiidi le ipa ye noonoo kidi tooltool ke ni mai i le imot lapau.

³Nen le kumata be tatoo betanga ke Maro yo lono be tatoo nga, ngan la be ipatnai idi ben idi nga lod galanga moolmool ye nga. ⁴Inbe tool yo iwete nen, “Au i lok galanga moolmool ye,” bong be itoo betanga yo Maro lono be tatoo ngan tiap nga, ngan ya in tool ke kaplungunu, inbe betanga moolmool ke Maro sa iken lono tiap. ⁵Bong kumata tool atu be itoo betanga ke Maro nga, ngan tool tani in la lono pang Maro mai san moolmool i. Le dada yo be lod galanga ben Maro iyepe yidi i, in nen: ⁶Kumata sei tool iwete be Maro iyepe ye i, in ole ipa le dawa ben Yesu ipa nga.

⁷Ang di tooltool kiau nga, ngan betanga yo awode pang be katoo i, in betanga paunu tiap. Bong i betanga gurunu tani yo kakauu kulkulunu yege ye kene yo katara lomim medana pang Kirisi ye i. Le betanga gurunu tani i, in betanga tani la kalonga koot i. ⁸Bong betanga yo nookoot awode pang i, in paunu lapau, yesoo betanga tani in kanono pombe ye Kirisi le nookoot nga kanono pombe yang lapau. Nen le idi nga lod galanga be betanga tina ngan moolmool, yesoo todo i nga be imot, inbe sul moolmool in ilolo oo.

⁹Le kumata tool sa iwete be ya in iyepe ye sul loloana, bong be lono dook tiap pang ene san yo itara lono medana pang Kirisi in nga, ngan tool tani in dada dook tiap ki ngan ipaposi ben ya in ngan iyepe todo lono go. ¹⁰Nen le kumata tool sa be lono pang ene atu yo itara lono medana pang Kirisi in mai san nga, ngan ya in iyepe ye sul loloana. Le sul loloana tani yo iyepe ye i, in so sa yo be iyei a ikapsap ye noonoo, ngan tiap. ¹¹Bong sei tool be lono dook tiap pang ene san nga, ngan ya in iyepe todo lono, inbe ipa todo lono le lon galanga ye ni yo be ipa pang ye in tiap, yesoo todo iyakala matana.

¹² Ang di natuk nga, ngan awodo rau i pang,
yesoo noonoo kiang ngan Maro igiri ye gurana ke Kirisi, inbe ye urata yo iyei i.

¹³ Ang di tamak nga, ngan awodo rau i pang,

yesoo ang ngan lomim galanga moolmool ye tool yo iyepe mukot
 ye kene yo Maro itar lang le tana tiao nga.
 Ang di tamoto yo tinimim paunu nga, ngan awodo rau i pang,
 yesoo ang ngan kalloso tool dook tiap yo Satan i.
 Ang di natuk yo lok pang mai san nga, ngan awodo rau i pang,
 yesoo ang ngan lomim galanga moolmool ye Tamada.
¹⁴ Ang di tamak nga, ngan awodo rau i pang,
 yesoo ang ngan lomim galanga moolmool ye tool tani yo iyepe
 mukot yege ye kene yo Maro itar lang le tana tiao nga.
 Ang di tamoto yo tinimim paunu nga, ngan awodo rau i pang,
 yesoo ang ngan kakodo le kamede ye lomim medana yo kataru i,
 inbe betanga ke Maro iken lomim le imede
 le ang ngan kalloso tool dook tiap yo Satan i.

Kin Lomim Mai San Pang So Yo Ke Tana I Nga Be

¹⁵ Awete pang nen, kin katara lomim le mai san pang dada yo ke tana i
 le ipa ye so ki nga le imot ngan be. Ngan kumata le tool sa be lono pang
 so ke tana i mai san nga, ngan tool tani in lono pang Tamada mai san
 tiap. ¹⁶ Le dada dook tiap tina le imot yo ke tana i nga, ngan la dada ke
 be di tooltool tiyei so dook tiap yo lodi be tiyei a lodi ponana ye nga,
 inbe matadi gorengana ye so kidi diedi, inbe di tapdi tipayit di ye so yo
 tiyei nga. Ngan dada yo nen nga, ngan ipa ye Tamada tiap, bong so yo
 nen ngan so ke tana i leu. ¹⁷ Nen le tana i ipa ye di tooltool yo lodi be
 titoo dada dook tiap ki tina nga, ngan ole tilledi le imot. Bong tool yo
 iyei urata le itoo Maro lono i, in ole ikaua yepongo dook mata yo taukan
 motingi i.

Koi Ke Kirisi In Pombe Oo

¹⁸ Ang di natuk nga, lal yo be tana i imot ye i, in iman potai oo. Muku
 ngan amwete pang a kalongo ye koi ke Kirisi be ole pombe ye tana i. Nen
 le nookoot nga di koi ke Kirisi alunu la pompombe koot nga. Ngan nen
 le ole lod galanga nen, lal yo be tana i imot ye i, in o iman potai oo. ¹⁹ Di
 tooltool yo nen ngan muku ngan taye di tagaua, motong la tikoo yidi a
 tila nga. Le di ngan di tooltool kiidi moolmool tiap. Kumata be di ngan
 di tooltool kiidi moolmool nga, ngan matin nga le taye di tayepe. Bong
 tiyegidi a tila le lod galanga nen, di tooltool tina ngan sa yo tooltool kiidi
 moolmool ngan tiap.

²⁰ Bong ang ngan, Tool Tani Yo Maro Ipootoo Panga Ya Taunu I, in
 imaia Maro Amunu Silene ilo lomim nen le ang le imot ngan lomim
 galanga ye betanga yo moolmool i. ²¹ Ngan ye yo awodo betanga nga
 pang nga, yesoo o lok tar be ang ngan lomim galanga ye betanga
 moolmool i tiap, ngan tiap. Bong awodo betanga nga pang nga, yesoo

lomim galanga ye betanga moolmool, inbe lomim galanga ye betanga yo ke kaplungunu ngan sa ipa ye betanga moolmool i, ngan tiap. ²²Ngan tool ke kaplungunu in sei? In tool tani yo iwete be Yesu in Kirisi tiap i. Inbe tool yo nen i, in koi ke Kirisi inbe ya in iwala murini pang Tamada iye Natunu. ²³Le sei tool be iwala murini pang Natunu nga, ngan tool tani in iwala murini pang Tamana lapau. Inbe sei tool be itara lono medana pang Yesu be ya in Maro Natunu nga, ngan tool tani in itara lono medana pang Tamana lapau.

²⁴Nen le betanga tina yo kalongo kulkulunu ye kene yo katara lomim medana pang Kirisi ye in nga, ngan kaparama le imede. Ngan kumata le be kaparama le imede nga, ngan o kayege dada ke Tamada iye Natunu tiap, bong ole katoo le iken so. ²⁵Ngan Kirisi ipamede betanga paidi nen, be ole ikaua yepongo dook mata yo taukan motingi i, in paidi.

²⁶Au i yo a le awodo betanga tina ngan pang nga, ngan be awete pang ye di tooltool tina yo tikapye be tillungang ye betanga kidi nga. ²⁷Bong ang ngan Kirisi imaia Maro Amunu Silene ilo lomim a kakauu le nookoot ngan iyepe yang. Nen le Amunu Silene tani in ipatomonai ang ye so tina ngan le imot, inbe so tina yo ipatomonai ang ye nga, ngan moolmool le doko tiap. Le kin kamalum pang tool sa mulu be ipatomonai ang ye patomonaingi san mulu, ngan be. Ngan nanga, katoo patomonaingi ke Amunu Silene yo ipatomonai ang ye nga, ngan la be kayege dada ke Kirisi tiap, bong katoo le iken so nga.

Tayepe Ben Maro Di Natunu

²⁸Le ang di natuk nga, kin katoo dada yo ke Kirisi nga le ikenen leu. Ngan la be ye kene yo be pombe mallangana ye in nga, ngan idi nga ole moomoodoo tiap, bong ole takodo le tamede ye kene yo be takodo matana ye i. ²⁹Ngan nanga, kumata le be lomim galanga nen be Kirisi in ya tool noonoonoo ke Maro nga, ngan ole lomim galanga nen lapau, be di tooltool le imot yo titoo dada noonoonoo nga, ngan Maro di natunu.

3 ¹Le kakamata, Tamada in lono paidi mai le mai san! Nen le ikiu idi be idi nga ya di natunu. Le moolmool, idi nga Maro di natunu. Ngan ye punu yo a le di tooltool ke tana i lodi galanga yidi tiap nga, ngan di ngan lodi galanga ye Maro tiap lapau. ²Le ang di tooltool kiau nga, nookoot nga idi nga Maro di natunu. Inbe pang dama ni ngan ole tayepe belei in ila mallangana tiao. Bong lod galanga nen ye kene yo be Kirisi imulu a isi ye in nga, ngan ole tayepe dawa ben ya i, yesoo ole takamata moolmool ben in ya tani nain. ³Nen le di tooltool le imot yo titara lodi le atu panga a tinamu nga, ngan tiyei di tapdi le tinidi galanga dook mata ye Maro matana dawa ben Kirisi ya taunu yo tinin galanga i.

⁴Bong di tooltool le imot yo tiyei noonoo nga, ngan di ngan tiwala muridi pang ger ke Maro. Le moolmool, noonoo in dada ke be tawala

muridi pang ger ke Maro. ⁵Bong ang ngan lomim galanga nen, Kirisi in yo a le isi nga, ngan be si igiri noonoo kiidi. Ngan ya in noonoo sa yo iken ye, ngan tiap. ⁶Nen le sei tool yo igaua lono le atu pang Kirisi i, in o ke be iyei tootoo noonoo tiap. Bong sei tool yo isootoo yeingi noonoo i, in ikamata touo Kirisi pitiap, inbe lon galanga ye pitiap yege.

⁷Ang di natuk nga, ngan kin katar talngamim pang tool sa yo be ikaua lungunu yang, in be. Sei tool yo iyei dada dook mata i, in tool noonoonoo ke Maro dawa ben Kirisi in tool noonoonoo ke Maro nga. ⁸Le sei tool yo iyei noonoo go i, in tool ke tool kuto mai kidi so sadi, yesoo mukot yege nga, ngan ya in la imuku ye yeingi noonoo i. Le ye punu in la le Maro Natunu isi pombe mallangana nga, ngan be si igarung urata ke tool kuto mai kidi so sadi tani. ⁹Ngan nanga, sei tool yo iyei Maro Natunu i, in o ke be iyei tootoo noonoo tiap, yesoo dada dook mata ke Maro ngan iken ye. Nen le ke be isootoo yeingi noonoo tiap, yesoo ya in Maro Natunu. ¹⁰Le dada yo be lod galanga ye di sema yo Maro di natunu nga, inbe di sema yo tool kuto mai kidi so sadi in di natunu nga, in nen. Tool yo iyei dada dook mata tiap i, in Maro natunu tiap. Inbe tool yo lono mai san pang ene yo itara lono medana pang Yesu tiap i, in Maro natunu tiap lapau.

Lomim Pang Di Diemim Mai San

¹¹Le betanga tani yo ang ngan kalonga kulkulunu yege ye kene yo katara lomim medana pang Kirisi ye i, in nen; be lodo pang di diede mai san. ¹²Ngan nen le kin taye ben Kaen be. Ya in tool dook tiap Satan idiwidiwoo le iraumata taini a imata. Inbe nga yelei a le iraumata taini nga? Yesoo, dada yo ki ngan dook tiap, inbe so yo taini iyei ngan itoo dada noonoonoo ye.

¹³Nen le ang di diek nga, kumata di tooltool ke tana i be tiyei koi pang nga, ngan kin katakrai be. ¹⁴Idi nga lod galanga nen, be nookoot nga tayege dada ke matenge, inbe taman tayepe ye dada yo ke yepongo dook mata i, yesoo idi nga lodo pang di diede yo titara lodi medana pang Kirisi nga, ngan mai san. Bong kumata sei tool be lono pang di diene mai san tiap nga, ngan ya in ngan iyepe ye dada ke matenge go. ¹⁵Le tool be lono dook tiap pang ene nga, ngan ya in dawa ben iraumata tool a imata. Inbe ang ngan lomim galanga nen, tool yo ke raumatenge di tooltool i, in o ke be ikaua yepongo dook mata yo taukan motingi i, in tiap.

¹⁶Ngan Yesu Kirisi irai a lono le tinini a imata be ilonidi, inbe ye dada ki yo nen i, in be ipatnaia dada yo be lodo pang di diede ye mai san i. Nen le idi lapau ole taraia tiniidi a talon di diede yo titara lodi medana pang Yesu nga. ¹⁷Le kumata tool atu be so ki ke tana i iye, inbe ikamata ene san yo imaka ye so, bong be lono panga tiap a iloni tiap nga, ngan tool tani in dada ke Maro yo be lodo pang di diede ye mai san i, in iken ye tiap. ¹⁸Le ang di natuk nga, kin tawete sokorai be lodo pang di diede

kapala mai san ye betanga kiidi, too ye koodoo leu be. Bong be nen ngan tayeida dada yo dook mata ngan pang di. Ngan la be lodo tani yo pang di diede mai san i, in itoo dada ke betanga moolmool yo ke Maro nga.

Di Tooltool Ke Kirisi Tikodo Le Timede Ye Maro Matana

¹⁹Ngan nanga, kumata be lodo pang di diede mai san le tayeida dada dook mata pang di nga, ngan ole lod galanga nen; idi nga tooltool ke Maro inbe tatoo betanga yo moolmool i. Le ye dada yo nen i, in la be idi nga o ke be moomoodoo ye Maro tiap. ²⁰Nen le ye kene yo lod wetewete be idi nga tooltool ke yeingi noonoo nga, ngan ke be moomoodoo tiap, yesoo ya in lon galanga ye so tina le imot yo tayeida, ngan oo. Inbe so yo Maro iwete ngan moolmool le illos so yo lod wetewete ye nga.

²¹Le ang di tooltool kiau nga, kumata lod wetewete be idi nga tooltool ke yeingi noonoo tiap nga, ngan idi nga o ke be tatattadai tiap, bong takodo le tamede ye Maro matana. ²²Nen le kumata be tapatarau a tatoru ye so atu nga, ngan ole ikauu paidi, yesoo idi ngan tatoo betanga yo iwete be tatoo nga, inbe tayeida dada yo ya in lon ponana ye nga. ²³Ngan betanga ki tani in nen; be idi nga ole tatara lodo medana pang Natunu yo ene Yesu Kirisi i, inbe lodo pang di diede kapala mai san dawa ben yo iwete paidi koot nga. ²⁴Nen le di sema tooltool be titoo betanga tina ke Maro nga, ngan di ngan tigaua lodi le atu pang Maro, inbe Maro iyepe ye di. Inbe dada yo be idi nga lod galanga ben ya in iyepe yidi i, in ye Amunu Silene yo ikauu paidi i.

Katouotouo Di Tooltool Ke Kaplungunu

4 ¹Ang di tooltool kiau yo lok pang mai san nga, kin katara lomim medana pang di tooltool le imot yo tiwete be betanga yo tikap ngan ipa ye Maro Amunu Silene, ngan be. Bong be nen ngan katouo di muku, ngan la be lomim galanga dook ye sei tool yo ikaua Maro Amunu Silene moolmool i. Yesoo, di tooltool alunu ke kaplungunu yo tiwete be di ngan Maro koonoo nga, ngan di la nookoot nga tipa ye ni mai i le imot nga. ²Le i dada tani yo be kakilala Maro Amunu Silene ye in nen; sei tool yo iwete be Yesu Kirisi in isi tana le iyei tool moolmool i, in Maro Amunu Silene iyepe ye. ³Bong sei tool iwete betanga nen ye Yesu tiap i, in Maro Amunu Silene iyepe ye tiap. Ya in so sadi yo iyei koi pang Kirisi in iyepe ye. Muku ngan kalongo betanga ye be ole isi pombe, in la nookoot nga isi a si iyepe ye tana i oo.

⁴Ang di natuk nga, ang ngan ke Maro le karautoo gurana kidi tooltool ke kaplungunu yo tiwete be di ngan Maro koonoo nga. Yesoo, Maro Amunu Silene yo iken lomim in gurana ki mai san le illos gurana ke tool kuto mai kidi so sadi yo iken ye di tooltool ke tana ngan lodi i. ⁵Di tooltool ke kaplungunu yo tiwete be di ngan Maro koonoo nga, ngan

ke tana i. Nen le tiwetewete ye so ke tana i leu, inbe di tooltool ke tana i tilongo betanga kidi. ⁶Bong am nga ke Maro. Nen le sei tool be lon galanga moolmool ye Maro nga, ngan ole ilongo betanga kiam. Bong sei tool yo Maro natunu tiap i, in o ke be ilongo betanga kiam tiap. Le i dada tani yo be takilala betanga kidi tooltool ngan tikap betanga moolmool ye Maro Amunu Silene, too tikap betanga ke kaplungunu ye di so sadi.

Ole Lodo Pang Di Diede Mai San

⁷Ang di tooltool kiau nga, idi nga ole lodo pang di diede mai san, yesoo dada dook mata tani i, in ipa ye Maro. Le sei tool be lono pang di diene mai san nga, ngan ya in Maro natunu, inbe lon galanga moolmool ye. ⁸Bong sei tool be lono pang di diene mai san tiap i, in lon galanga moolmool ye Maro tiap, yesoo dada yo be lodo pang di diede ye mai san i, in punu la Maro i. ⁹Inbe Maro ipatnaia lono yo paidi mai san in nen: Ya in iwanga Natunu yo ataleu, in paidi a isi tana be si ikau idi a tayepe ye yepongo dook mata yo taukan motingi i. ¹⁰Ngan la dada moolmool tani yo be lodo pang di diede ye mai san i, in ipa ye Maro. Nen le kin lod tar be idi nga lodo pang Maro mai san dawa ben nen, ngan be, bong ya la lono paidi mai san a le iwanga Natunu a isi be si irai tinini le imot inbe tiraumate a be nen ngan Maro iyemenai idi ye noonoo kiidi be.

¹¹Ang di tooltool kiau nga, Maro lono paidi mai san le idi nga ole lodo pang di diede kapala mai san nen lapau. ¹²Ngan tool atu sa ikamata touo Maro pitiao, bong kumata be idi ngan lodo pang di diede mai san nga, ngan ole Maro iyepe yidi, inbe dada ki yo be lono pang di tooltool ye mai san i, in ole iken yidi lapau.

¹³Le idi nga lod galanga be tagaua lodo le atu pang Maro, inbe iyepe yidi, yesoo ya in ikaua Amunu Silene paidi. ¹⁴Inbe am di aposol nga amkamata Yesu, inbe amwetewete pang di tooltool ye yo Tamada iwanga Natunu a isi be si ikap di tooltool le imot ke tana i a ipamulu di ye so dook tiap yo be igarung di in nga. ¹⁵Ngan nanga, kumata tool atu iwete be Yesu in Maro Natunu nga, ngan ya in igaua lono le atu pang Maro, inbe Maro iyepe ye. ¹⁶Inbe idi nga lod galanga nen be Maro in lono paidi mai san ngan la le tatara lodo medana pang nga.

Ngan Maro in tool tani yo lono mai san pang di tooltool le ikenen leu i. Le sei tool be lono pang di diene mai san nga, ngan ya in igaua lono le atu pang Maro, inbe Maro iyepe ye. ¹⁷Le kumata be tayepe nen nga, ngan ole dada ki yo be lono pang di tooltool ye mai san i, in iken yidi le imede. Inbe idi nga o ke be tatattadai ye lal yo Maro itaru be ikarata betanga kidi tooltool ye in tiap, yesoo yepongo kiidi ye tana i nga, ngan ole tayepe le dawa ben Kirisi ya taunu. ¹⁸Nen le tool yo lono pang di diene mai san i, in o ke be itattadai tiap. Le kumata dada yo be lodo pang di diede ye mai san in iken ye tool atu lono le imede koot nga, ngan tool in inganga

dada ke tattadaingi le imot. Ngan ye punu yo di tooltool titattadai ye i, in yesoo di ngan lodi galanga be ole Maro iyemenai di ye urata dook tiap kidi yo tiyei nga. Le kumata tool atu be itattadai nga, ngan ole lod galanga nen, dada yo be lodo pang di diede ye mai san i, in iken lono le imede tiap.

¹⁹Ngan idi nga ole lodo pang di diede mai san, yesoo Maro lono paidi mai san muku. ²⁰Le kumata tool atu iwete be ya in lono pang Maro mai san, bong be lono dook tiap pang ene san yo itara lono medana pang Yesu in nga, ngan ya in tool ke kaplungunu. Awete nen, yesoo kumata le be lono mai san pang ene yo ikamata, in tiap nga, ngan ya in o ke be lono mai san pang Maro yo ikamata tiap, in tiap. ²¹Nen le betanga yo Maro ikauu paidi be tatoo in nen: Sei tool yo lono pang Maro mai san i, in ole lono pang di diene kapala yo titara lodi medana pang Yesu nga, ngan mai san nen lapau.

Tatara Lodo Medana Pang Maro Natunu

5 ¹Le di sema tooltool yo titara lodi medana pang Yesu be ya in Kirisi nga, ngan di ngan Maro di natunu. Inbe di sema tooltool yo lodi pang Tamada Maro mai san nga, ngan ole lodi pang di natunu mai san nen lapau. ²Ngan ye dada i, in la le lod galanga nen be idi nga lodo pang Maro di natunu mai san ye yo lodo pang Maro mai san, inbe ye yo tatoo betanga ki nga. ³Nen le dada yo ke be lodo pang Maro mai san moolmool ye i, in ole be tatoo betanga ki. Inbe betanga ki tina ngan o imoo paidi, ngan tiap, ⁴yesoo di tooltool le imot yo Maro di natunu nga, ngan di ngan gurana iken ye di ke be tiraautoo dada dook tiap ke tana i. Ngan idi nga tatara lodo medana pang Maro, ngan la le gurana ki iken yidi ke be taraautoo dada dook tiap ke tana i nga. ⁵Nen le sei tool be iraautoo dada dook tiap ke tana i? In tool yo itara lono medana pang Yesu be ya in Maro Natunu i, in ya la be iraautoo dada dook tiap ke tana i.

⁶Yesu Kirisi in tool tani yo ipa ye Tamada Maro a isi tana i. Ngan idi nga lod galanga be ipa ye Tamada a isi, yesoo ye so yo pombe pang ye nga ye kene yo tirriuu ye ran, inbe ye kene yo rara ki imati ye kai palasingi i. Ngan so yo nga pombe ye kene yo tirriuu ye ran in leu tiap, bong ye kene yo rara ki imati ye i, in lapau. Ngan la Maro Amunu Silene iwete betanga moolmool paidi ye Yesu Kirisi, inbe betanga ki tina ngan moolmool le imot. ⁷Le so tol la tiwetewete ye Yesu Kirisi nga; ⁸Maro Amunu Silene iye ran inbe rara. Inbe di tol tina ngan tiwete betanga gaongo leu.

⁹Ngan idi nga tatara lodo ye betanga yo di tooltool tiwete nga, bong betanga yo Maro iwete ngan moolmool le imot, le ke be tatara lodo medana ye le imot. Inbe betanga ki tina ngan iwetewete ye Natunu. ¹⁰Le sei tool be itara lono medana pang Maro Natunu nga, ngan ya in ikap

betanga tina yo Maro iwete koot ngan a itar lo lono. Bong tool be itara lono ye betanga ke Maro tiap nga, ngan ben ya in iwete be Maro i tool ke kaplungunu, yesoo ya in itara lono medana ye betanga ke Maro yo iwetewete ye Natunu, ngan tiap. ¹¹Inbe betanga tina yo Maro iwete paidi, ngan nanga: Maro in ikaua yepongo dook mata yo taukan motingi in paidi, inbe yepongo dook mata tani in ipa ye Natunu. ¹²Nen le sei tool be ikaua Natunu ngan ikaua yepongo dook mata yo taukan motingi i. Bong sei tool be ikaua Maro Natunu tiap nga, ngan o ke be ikaua yepongo dook mata tani in tiap lapau.

Yepongo Dook Mata Yo Taukan Motingi I

¹³Au i awodo betanga nga pang ang di tooltool yo katara lomim medana pang Maro Natunu nga, a be nen ngan lomim galanga be ang ngan kakaua yepongo dook mata yo taukan motingi i. ¹⁴Nen le idi nga ke be tatattadai tiap, bong takodo le tamede ye Maro matana. Le kumata be tapatarau a tatoru ye so sa le gaongo ye ya lono nga, ngan ole ilongo pataraungu kiidi. ¹⁵Inbe lod galanga nen, kumata be ilongo pataraungu kiidi ye soo so yo tatoru ye nga, ngan so tina ngan ole takap moolmool.

¹⁶Kumata le ang tina ngan sa be ikamata ene san yo itara lono medana pang Yesu in be iyei noonoo, bong be noonoo tani in ke be iyei le imata tiap nga, ngan ole ipatarau pang Maro a be nen ngan iloni a ikaua yepongo yo dook mata in panga mulu. Au i awete ye di tooltool la tiyei noonoo yo ke be iyei di a timmata tiap nga. Inbe noonoo kapala yo ke be iyei di tooltool le timmata nga, ngan au i awete be kapatarau ye tiap. ¹⁷Ngan dada tina le imot yo dook tiap nga, ngan noonoo. Bong noonoo yo kapala ngan ke be iyei di tooltool a timmata tiap.

¹⁸Idi nga lod galanga nen; sei tool yo Maro natunu i, in ke be isootoo yeingi noonoo tiap. Inbe Kirisi yo Maro natunu i, in ole matan kala dook, a be nen ngan tool dook tiap Satan ke be itara baene ye tiap. ¹⁹Inbe lod galanga be idi nga Maro di natunu, inbe di tooltool le imot yo ke tana i nga, ngan tiyepe la gurana ke tool dook tiap yo Satan, in parmana. ²⁰Inbe lod galanga nen lapau ye Maro Natunu yo isi tana i. Ya in ikaua lo galanga paidi a be nen ngan lod galanga ye Maro yo moolmool i. Ngan nen le tagaua lodo le atu pang Maro yo moolmool i, dawa ben yo tagaua lodo le atu pang Natunu Yesu Kirisi nga. Ngan ya in la Maro moolmool, inbe yepongo dook mata yo taukan motingi i, in ipa ye.

²¹Ang di natuk yo lok pang mai san nga, kin ang tapmim ngan kakap tutang dook leu ye di maro yo ke kaplungunu nga.